




Status Tindakan Bagi Isu Yang Dilaporkan Dalam Laporan Ketua Audit Negara Mengenai Aktiviti Jabatan/Agensi dan Pengurusan Syarikat Kerajaan Negeri

Kedudukan Setakat 31 Julai 2024

STATUS TINDAKAN BAGI ISU YANG DILAPORKAN DALAM LAPORAN KETUA AUDIT NEGARA MENGENAI AKTIVITI JABATAN/AGENSI DAN PENGURUSAN SYARIKAT KERAJAAN NEGERI

- KEDUDUKAN SETAKAT 31 JULAI 2024

1.1. Jabatan Audit Negara (JAN) komited membantu jabatan/agensi dan syarikat Kerajaan Negeri dengan memantau kelemahan yang telah dibangkitkan dalam Laporan Ketua Audit Negara (LKAN). Papan Pemuka Dalam Talian Ketua Audit Negara (Auditor General's Dashboard - AGD) telah dibangunkan bagi memaparkan isu dan status tindakan terkini terhadap isu yang dilaporkan. Kaedah ini berjaya membantu jabatan/agensi dan syarikat Kerajaan Negeri untuk menyalurkan maklumat dengan cepat dan pantas mengenai tindakan yang telah/sedang diambil melalui pengemaskinian maklum balas secara dalam talian. Hal ini membuktikan komitmen dan keprihatinan Kerajaan dalam menjelaskan kedudukan terkini isu LKAN serta tindakan yang diambil untuk makluman semua pihak berkepentingan yang berkaitan dan pihak awam secara keseluruhannya.

1.2. Sejak tahun 2012, status tindakan bagi isu LKAN dipaparkan melalui sistem AGD. Paparan secara dalam talian ini menjadi pencetus bagi mempercepatkan penyelesaian isu Audit yang dibangkitkan dalam LKAN oleh jabatan/agensi dan syarikat Kerajaan Negeri. Ia sekaligus dapat memperbaiki prestasi tadbir urus penyampaian sektor awam secara keseluruhannya.

1.3. Portal AGD juga boleh diakses oleh semua pihak termasuk orang awam untuk mengetahui **status tindakan bagi isu LKAN secara masa nyata (real time)**. Setiap isu dikategorikan mengikut tiga warna ikon (traffic light icons) iaitu **Merah (tiada maklum balas atau maklum balas tidak menjawab isu yang dibangkitkan)**, **Kuning (dalam tindakan)** dan **Hijau (tindakan telah selesai diambil)**. Maklumat mengenai status tindakan terhadap isu yang dipaparkan juga boleh digunakan sebagai panduan kepada jabatan/agensi negeri dan syarikat Kerajaan Negeri untuk mengelakkan kelemahan yang sama berulang.

1.4. Susulan Audit secara dalam talian melalui sistem AGD membantu memastikan isu Audit dan syor berkaitan dengan isu yang dilaporkan disusul dan tindakan penambahbaikan diambil oleh jabatan/agensi dan syarikat Kerajaan Negeri. Susulan yang dilaksanakan adalah berdasarkan piawaian pengauditan antarabangsa yang dikeluarkan oleh The International Organization of Supreme Audit Institutions (INTOSAI). Perenggan 42, International Standards of Supreme Audit Institutions (ISSAI) 300 menyatakan "*Auditors should follow up previous audit findings and recommendations wherever*

appropriate. Follow-up should be reported appropriately in order to provide feedback to the legislature together, if possible, with the conclusions and impacts of all relevant corrective actions”.

1.5. Tindakan susulan melalui sistem AGD dan diikuti dengan pelaporan mengenai status susulan dalam LKAN adalah selaras dengan peruntukan di bawah subseksyen 9(8), Akta Audit 1957 [Akta 62] yang memperuntukkan “walau apa pun peruntukan seksyen ini, Ketua Audit Negara boleh pada bila-bila masa mengemukakan laporan kepada Yang di-Pertuan Agong mengenai apa-apa perkara yang berbangkit daripada pelaksanaan mana-mana tugasnya atau penjalanan mana-mana kuasanya di bawah Akta ini atau di bawah mana-mana undang-undang bertulis, dan boleh mengemukakan satu salinan mana-mana laporan sedemikian kepada Raja atau Yang di-Pertua Negeri sesuatu Negeri atau kepada seseorang Menteri”.

1.6. Setakat 31 Julai 2024, susulan Audit telah dilaksanakan terhadap 69 kajian/pengauditan di jabatan/agensi dan syarikat Kerajaan Negeri Perak. Liputan susulan terhadap isu Audit yang dilaporkan dalam LKAN tahun 2012 hingga 2022 adalah seperti dalam **Jadual 1**.

JADUAL 1
BILANGAN ISU SETAKAT 31 JULAI 2024


TAHUN	BILANGAN KAJIAN/PENGAUDITAN (Bilangan Diaudit)	SUSULAN AUDIT (Bilangan Isu Disusul)
2012	2	2
2013	9	50
2014	10	77
2015	8	67
2016	4	28
2017	5	44
2018	6	64
2019	4	40
2020	5	35
2021	9	75
2022	7	47
JUMLAH	69	529

Sumber: Maklumat Dijana Daripada Sistem AGD Pada 31 Julai 2024

1.7. Setakat 31 Julai 2024, terdapat 529 isu telah dibangkitkan dalam LKAN Tahun 2012 hingga 2022 mengenai aktiviti jabatan/agensi serta pengurusan syarikat Kerajaan Negeri Perak. Sebanyak 479 isu (90.5%) daripada keseluruhan isu tersebut telah selesai, 49 isu (9.3%) masih Dalam Tindakan manakala satu (0.2%) isu Tiada Tindakan oleh


jabatan/agensi dan syarikat Kerajaan Negeri Perak. Ringkasan adalah seperti dalam **Carta 1** dan **Carta 2**.

CARTA 1
STATUS TINDAKAN ISU LAPORAN KETUA AUDIT NEGARA
TAHUN 2012 HINGGA 2022 SETAKAT 31 JULAI 2024




Sumber: Maklumat Dijana Daripada Sistem AGD Pada 31 Julai 2024

CARTA 2
STATUS TINDAKAN TERHADAP ISU YANG DIBANGKITKAN DALAM LKAN
MENGIKUT TAHUN SETAKAT 31 JULAI 2024



Sumber: Maklumat Dijana Daripada Sistem AGD Pada 31 Julai 2024

1.8. Setakat 31 Julai 2024, sejumlah 49 (9.3%) dan satu (0.2%) daripada 529 isu yang masih Dalam Tindakan dan Tiada Tindakan melibatkan LKAN Tahun 2018 hingga 2022. Bilangan isu Dalam Tindakan yang tertinggi adalah bagi LKAN Tahun 2021 iaitu sebanyak 25 isu. Butiran terperinci dan kedudukan terkini isu yang berstatus Dalam Tindakan dan Tiada Tindakan mengenai aktiviti jabatan/agensi serta pengurusan syarikat Kerajaan Negeri Perak boleh diakses melalui sistem AGD menggunakan *QR Code* seperti berikut :



Nota: Maklumat yang dipaparkan semasa imbasan melalui *QR Code* adalah yang terkini.

1.9. Jabatan/agensi dan syarikat Kerajaan Negeri Perak adalah disyorkan untuk terus komited melaksanakan tindakan penambahbaikan. JAN berperanan untuk menyusul isu yang belum selesai sehingga tindakan korektif dan penambahbaikan yang bersesuaian diambil. Status bagi tindakan tersebut dipaparkan melalui portal AGD.